



Aningaasaqarnermut Naalakkersuisoq

Ulloq: 17-09-2021

J.nr.: 01.31.06/21-00949

Aningaasaqarnermut Akileraartarnermullu Ataatsimiititaliap pingasunngornermi ulloq 15. september 2021-mi aalajangiineranik Naalakkersuisunut ilisimatitsineq

Aningaasanik missingersuutitut sunnuteqanngitsumik immikkuullarissumik Inatsisartunut qinersisoqarnerani malinnaanermut aningaasartuutitut konto pingaarnermiit 40.91.03 konto pingaarnermut 40.94.17 Kalaallit Nunaata Radioa KNR-imut nuussineq. Ataatsimiititaliap suliaa nr. 01.31.06/21-00949

”Naalakkersuisut inassutigaa,

- Konto pingaarneq 40.94.17 Kalaallit Nunaata Radioa aningaasaliissutit 904.000,00 kr.-inik amerlineqassasut,
- Konto pingaarneq, 40.91.03 Pikkorissartitsinermit suliffeqarfik aningaasaliissutit 904.000,00 kr.-inik ilanngarneqassasut.”

Aningaasaqarnermut Ataatsimiititaliap oqaaseqaatai

Inatsisartunut immikkut ittumik qinersineq tunngavigalugu KNR-imut aningaasaliissutit 904.000,00 kr.-inik amerlineqarnissaat qinnuteqaat una aqqutigalugu Naalakkersuisut kissaatigaat.

Missingersuutitut qaangeereernermit ataatsimiititaliap ilassutitut aningaasaliissuteqartarnera nalinginnaanngimmat Aningaasaqarnermut Ataatsimiititaliamit oqaatigineqassaaq. Sippuinerit siusinnerusukkut pisunut ilassutitut aningaasaliissuteqarnissaq Naalakkersuisut suliami matumani qinnutigaat. Tassunga atatillugu missingersuutit pillugit malittarisassani immikkoortoq 4.2.3 ataatsimiititaliamit innersuussutigineqassaaq.

Tassunga atatillugu ataatsimiititaliap akineqartussatut kissaatigisaminik arlalinnik apequtissaqarpoq.

1. Aningaasat allassimasorpiaat KNR-imut pisassanngortinneqarnissaat uppersarneqanngitsoq ataatsimiititaliap isumaqarpoq. Tamanna akineqassasoq Aningaasaqarnermut Ataatsimiititaliamit qinnutigineqarpoq.
2. Qinnuteqaat una Aningaasaqarnermut Ataatsimiititaliamit aggustip naanerani aatsaat tiguneqarpoq. Immikkulli qinersineq pivoq 2021-mi aprillimi.
 - a) Sooq qinnuteqaat una Aningaasaqarnermut Ataatsimiititaliamit aatsaat maanna tiguneqarpa?

- b) Illassutitut aningaasaliissuteqartoqarnissaanik kissaateqarluni KNR qanga Naalakkersuisunut saaffiginnippa?
3. 2021-mi aningaasanut inatsimmi 2021-mut 68 mio. kr.-it, taamatuttaaq 2022-mut, 2023-mut aammalu 2024-mut 68 mio. kr.-it, immikkoortinneqarput, soorluttaaq AI2020-mi 68 mio. kr.-it immikkoortinneqartut.
- a) Siuliani allassimasutut takuneqarsinnaasutut 2020-mi, 2021-mi kiisalu ukiuni missingersuusiorfinni aningaasaliissutit aalaakkaapput. Nalinginnaasumik qineqqusaarnernut KNR aningaasanik qanoq immikkoortitsisarpa?
- b) 2021-mi immikkut ittumik qinersinissaq sioqqullugu qinersineq kingulleq tassaavoq 2018-imi qinersineq. Taamaattumillu qinigaaffik ukiunik sisamanik sivilissusilik 2022-mi naasussaagaluarluni, tamatumani nalinginnaasumik qinersisoqartussaagaluarluni. Qinersinissamut tassunga KNR aningaasanik qanoq immikkoortitsisimava?
4. 2021-imi immikkut ittumik qinersinerup ilutigisaanik kommunalbestyrelsinut, nunaqarfinni aqutsisunut ilagiillu sinnisuannut qinersisoqarpoq.
- a) Qinersinerit ataatsikkut ingerlanneqarnerat qinersinernik taaneqartunik KNR-ip aallakaatitsineranut missingersuutitigut iluaqutissarsiffiusimangilaq?

Aningaasaqarnermut Ataatsimiititaliap aalajangiinera

Siuliani allassimasutut oqaaseqaateqarluni apeqquteqarlunilu Naalakkersuisut inassuteqaataat Aningaasaqarnermut Ataatsimiititaliamit **itigartinneqarput**.

Ataatsimiititaliap sinnerlugu



Paneeraq Olsen

Ataatsimiititaliap siulittaasua